



UNIVERSITÄTS-
BIBLIOTHEK
PADERBORN

Universitätsbibliothek Paderborn

Agenda, Sev Ritvale Osnabrvdense

Franz Wilhelm <Osnabrück, Bischof>

Coloniæ Agrippinæ

Bulla Coenæ Domini.

urn:nbn:de:hbz:466:1-41233

Quod si inter confitendum, vel etiam antequam incipiat confiteri, vox & loquela agrum deficiat, nutibus & signis conetur, quoad ejus fieri poterit, peccata pœnitentis cognoscere; quibus utcumque vel in genere vel in specie cognitis, vel etiam, si confitendi desiderium sive per se sive per alios ostenderit, absolvendus est.

Meminerit porro Sacerdos, agris non esse injungendam gravem aut laboriosam pœnitentiam, sed indicendam tantum illam, quam, si convaluerint, opportuno tempore peragant. Interim, juxta gravitatem morbi, aliquâ oratione aut levi satisfactione imposta & acceptata, absolvantur, prout opus fuerit.

Vt autem norint Confessarii, qui casus Reservati & Sedi Apostolica & Episcopo, legant sequentia.

BVLLA COENÆ DOMINI,

continens Casus præcipuos

SVMMO PONTIFICI reservatos,

à quibus Parochi, ordinarie, neminem

absolvere possunt.

IN nomine Sanctæ & individuæ Trinitatis, Patris, & Filii, & Spiritus sancti, Amen. PAVLVS EPISCOPVS, Servus servorum Dei, ad futuram rei memoriam.

Pastoralis Romani Episcopi vigilantia & sollicitudo, cum in omni Christianæ Reipublicæ pace & tranquillitate procuranda, pro sui muneris officio, assidue versatur, tum potissimum in Catholicæ fidei, sine qua impossibile est placere DEO, unitate atque integritate tenenda & conservanda, maxime elucet; nimirum, ut fideles Christi non sint parvuli fluctuantes, neque circumferantes omni vento doctrinæ in nequitia hominum ad cir-

cum-

cumventionem erroris; sed omnes occurrant in unitatem fidei, & agnitionem Filii Dei, in virum perfectum; neque se in hujus vitæ societate & communione lædant, aut inter se alter alteri offensionem præbeat, sed potius in vinculo charitatis conjuncti, tanquam unius corporis membra, sub Christo capite, ejusque in terris Vicario Romano Pontifice Beatissimi Petri successore, à quo totius Ecclesiæ unitas dimanat, augeantur in ædificationem, atque ita divina gratia adjutrice, sic præsentis vitæ quiete gaudeant, ut futura quoque beatitudine perfruantur. Ob quas sane causas, Romani Pontifices, prædecessores nostri, hodierna die, quæ anniversaria Dominicæ Cœnæ commemoratione solemnitas est, spiritualem Ecclesiasticæ disciplinæ gladium, & salutaria justitiæ arma, per ministerium Summi Apostolatus, ad Dei gloriam & animarum salutem, solemniter exercere consueverunt.

In hæreticos, eorum fautores, libros legentes, & schismaticos, qui ab obedientia Summi Pontificis recedunt.

I.

NOs igitur, quibus nihil optabilius est, quam fidei inviolatam integritatem, publicam pacem & justitiam, Deo autore, tueri, vetustum & solemnem hunc morem sequentes, excommunicamus & anathematizamus, ex parte Dei Omnipotentis, Patris, & Filii, & Spiritus sancti, auctoritate quoque BB. Apostolorum Petri & Pauli, ac nostra; quoscunque Hussitas, Wiclephistas, Lutheranos, Zuinglianos, Calvinistas, Hugonotos, Anabaptistas, Trinitarios, & à Christiana fide apostatas, ac omnes & singulos alios hæreticos, quocunque nomine nuncupentur, & cujuscunque sectæ existant; & eorum credentes, & quoscunque receptatores & fauto-

L

res,

res, & generaliter quoslibet fautores, & eorundem libros, hæresin continentes, vel de religione tractantes, sine autoritate nostra, & Sedis Apostolicæ, scienter legentes, aut tenentes, imprimentes, seu quomodolibet defendentes, ex qualibet causa, publice vel occulte, quovis ingenio vel colore: nec non schismaticos, & alios qui se à nostra & Romani Pontificis, pro tempore existentis, obedientia pertinaciter subtrahunt & recedunt.

*In appellantes à Papa ad futurum Concilium,
eorumque fautores.*

I I.

Item excommunicamus & anathematizamus omnes & singulos, cujuscunque status, gradus, seu conditionis fuerint, & interdicimus Vniversitates, Collegia & Capitula, quocunque nomine nuncupentur, ab ordinationibus, sententiis seu mandatis nostris, ac Romanorum Pontificum, pro tempore existentium, ad universale futurum Concilium appellantes, nec non eos, quorum auxilio vel favore appellatum fuerit.

In piratas, eorum receptores & fautores.

I I I.

Item excommunicamus & anathematizamus omnes piratas, cursarios, & latrunculos maritimos, & alios, præcipue qui, mare nostrum à Monte argentario usque ad Terracinam discurrentes, eos, qui in illo navigant, deprædantur, mutilant, interficiunt, rebusve & bonis suis spoliant, omnesque receptatores eorundem, & eis auxilium scienter dantes vel favorem.

In

In rapientes naufragorum Christianorum bona, aut scienter ab aliis rapta accipientes.

I V.

Item excommunicamus & anathematizamus omnes & singulos, qui Christianorum quorumcumque navibus, tempestate in diversum (ut dici solet) jactatis, naufragium passis, aut etiam submersis, sive in ipsis navibus sive ex eis dilapsa, & in mari vel littore inventa, cujuscunque maris regionibus & littoribus rapuerint, aut scienter ipsi sibi acceperint, aut ab aliis rapta seu accepta scienter receperint: ita, ut nec etiam ob quodcunque privilegium, consuetudinem, aut longissimi, etiam immemorabilis, temporis possessionem, seu alium quemcumque prætextum, excusari possint.

In imponentes nova Pedagia, & gabellas, vel eas augentes.

V.

Item excommunicamus & anathematizamus omnes, qui in terris suis nova pedagia seu gabellas, ad id potestatem non habentes, imponunt vel augent, aut imponi vel augeri prohibita exigunt.

In falsificantes litteras Apostolicas, aut supplicationes à quocunque auctoritatem habente signatas, aut falso fabricantes litteras Apostolicas.

V I.

Item excommunicamus & anathematizamus omnes falsarios litterarum Apostolicarum, & in forma brevis, ac supplicationum, gratiam vel justitiam concernentium, per Romanum Pontificem, vel S. R. E. Vicecancellarium, seu gerentes vices eorum, aut de mandato ejusdem Romani Pontificis signatorum, aut sub nomine ejusdem Pontificis seu Vicecancellarii, aut gerentes vices prædictorum, signantes sup-

plicationes easdem. Extendentes Constitutionem fel. rec. Innocentii Papæ III, quæ incipit, *Ad falsariorum*, cum omnibus pœnis in ea contentis, ad falsificantes seu mutantés supplicationes, per nos seu de mandato nostro signatas & datatas, sine nostra aut Datarii nostri licentia.

In deferentes arma, & alia belli usui apta, ad Turcas, & Reipublicæ Christianæ statum concernentia in damnum Christianorum nuntiantes.

V I I.

Item excommunicamus & anathematizamus omnes illos, qui equos, arma, ferrum, filum ferri, stannum, chalybem, omniaque alia metallorum genera, atque bellica instrumenta, lignamina, canabem, funes tam ex ipso canabe quam ex quacunque alia materia, & ipsam materiam, aliaque hujusmodi, quibus Christianos impugnant, deferunt Saracenis, Turcis & aliis Christiani nominis inimicis: nec non illos, qui, per se vel alium seu alios, de rebus Christianæ Reipub. statum concernentibus, in Christianorum perniciem & damnum, ipsos Turcas & Christianæ Religionis inimicos certiores faciunt, illisque ad id auxilium, consilium, vel favorem quomodolibet præstant Non obstantibus quibuscumque privilegiis & concessionibus, Principibus, Rebuspub. & Dominis, sive privatis personis, per nos & Sedem prædictam hætenus concessis, de hujusmodi prohibitione expressam mentionem non facientibus.

In impediētes eos, qui victualia & alia necessaria Romam deferunt.

V I I I.

Item excommunicamus & anathematizamus omnes, impediētes seu invadentes eos, qui victualia seu alia ad usum Romanæ curiæ necessaria adducunt; ac etiam

eos,

eos, qui, ne ad Romanam curiam adducantur vel deferantur, prohibent, impediunt, seu perturbant, vel qui talia fieri faciunt, vel facientes defendunt, cujuscunque fuerint ordinis, præminentia, conditionis & status, etiam si Pontificali vel Regali, vel alia quavis Ecclesiastica vel mundana præfulgeant dignitate.

Ad Sedem Apostolicam venientes, vel ab ea recedentes, suâ aut aliorum operâ ledentes, & sine jurisdictione vexantes in curia commorantes.

I X.

Item excommunicamus & anathematizamus omnes illos, qui ad Sedem Apostolicam venientes, & recedentes ab eadem, sua vel aliorum opera interficiunt, mutilant, spoliant, capiunt, detinent; nec non illos omnes, qui, jurisdictionem ordinariam vel delegatam à nobis vel à nostris iudicibus non habentes, illam sibi temere vendicantes, similia, contra morantes in eadem curia, audent perpetrare.

In eos, qui ex proposito Romipetas offendunt.

X.

Item excommunicamus & anathematizamus omnes, ex proposito interficientes, mutilantes, vulnerantes, detinentes, capientes seu deprædantes, Romipetas seu peregrinos ad Urbem causa devotionis seu peregrinationis, & prorsus omnes alios, ad Sedem Apostolicam accedentes, vel apud eam morantes, aut recedentes ab ipsa, vel illis dantes auxilium, consilium, vel favorem.

In offendentes S. R. E. Cardinales & alios Prælatos.

X I.

Item excommunicamus & anathematizamus omnes, interficientes, mutilantes, vulnerantes, verberantes, percutientes, capientes, carcerantes, detinentes, vel

hostiliter insequentes, S. R. E. Cardinales, ac Patriarchas, Archiepiscopos, Sedisque Apostolicæ Legatos vel Nuncios, aut eosdem ejicientes à suis Diœcesibus, territoriis, terris, seu Dominiis, eaque mandantes vel rata habentes, seu præstantes eis auxilium, consilium, vel favorem.

In eos, qui ad Romanam Curiam recurrentes offendunt, aut executionem litterarum Apostolicarum impediunt, vel ad gratiam impetrandam accedentes prohibent.

X I I.

Item excommunicamus & anathematizamus omnes illos, qui, per se vel alium vel alios, quascunque personas Ecclesiasticas vel sæculares, ad dictam curiam, super eorum causis & negotiis, recurrentes, illasque in eadem curia prosequentes, aut procurantes, negotiorumque gestores, Advocatos, Procuratores ipsorum, seu etiam auditores vel iudices, super dictis causis vel negotiis deputatis, occasione causarum vel negotiorum hujusmodi verberant, mutilant, vel occidunt, seu bonis spoliant, vel qui per se vel alium seu alios, directe vel indirecte, prædicta exequi, vel procurare, aut in eisdem auxilium, consilium, vel favorem præstare non verentur, cujuscunque præminentia vel dignitatis fuerint.

Appellantes, à gravamine vel futura executione litterarum Apostolicarum, ad Laicam potestatem.

X I I I.

Item excommunicamus & anathematizamus omnes tam Ecclesiasticos quam sæculares cujuscunque dignitatis, qui, prætexentes frivolam quandam appellationem à gravamine vel futura executione litterarum Apostolicarum, etiam in forma brevis, tam gratiam quam justitiam concernentium, nec non citationum,

inhibi-

inhibitionum, sequestrationum, monitoriorum, processuum executorialium, & aliorum decretorum, à nobis & à Sede prædicta, seu Legatis, Nunciis, Præsidentibus Palatii nostri, & Camera Apostolicæ, Auditoribus, Commissariis, aliisque Iudicibus & Delegatis Apostolicis emanatorum, & quæ pro tempore emanaverint; aut alias ad curias sæculares & laicam potestatem recurrunt, & ab ea, instante etiam Fiscus procuratore vel Advocato, appellationes hujusmodi admitti, ac litteras, citationes, inhibitiones, sequestra, monitoria & alia prædicta, capi & retineri faciunt: quive illa simpliciter, vel sine eorum beneplacito & consensu vel examine, executioni demandari, aut, ne Tabelliones & Notarii, super hujuscemodi litterarum & processuum executione, instrumenta vel acta conficere, aut confecta, parti, cuius interest, tradere debeant, impediunt vel prohibent, ac etiam partes, seu eorum agentes, consanguineos, affines, familiares, notarios, executores & subexecutores litterarum, citationum, monitoriorum, & aliorum prædictorum, capiunt, percutiunt, vulnerant, carcerant, detinent, ex civitatibus, locis & Regnis ejiciunt, bonis spoliant, perterrefaciunt, concutiunt, & comminantur per se vel alium vel alios, publice vel occulte, quive alias quibuscunque personis, in genere vel in specie, ne pro quibusvis eorum negotiis prosequendis, seu gratiis vel litteris impetrandis, ad Romanam Curiam accedant aut recursum habeant, seu gratias ipsas vel litteras à dicta Sede impetrent, seu impetratis utantur, directe vel indirecte prohibere, statuere, seu mandare, vel eas apud se, aut Notarios seu Tabelliones, vel alias quomodolibet retinere præsumunt.

*In executionem litterarum Apostolicarum aut aliarum
expeditionum impediētes, & prohibētes, ad
gratias impetrandas, accedentes.*

X I V.

Item excommunicamus & anathematizamus omnes & singulos, qui per se vel alios, autoritate propria, ac de facto, quarumcunque exemptionum vel aliarum gratiarum vel litterarum Apostolicarum prætextu, beneficiales & decimarum ac alias causas spirituales, & spiritualibus annexas, ab Auditoribus & commissariis nostris, aliisque iudicibus Ecclesiasticis avocant, illarumque cursum & audientiam, ac personas, Capitula, Conventus, Collegia, causas ipsas prosequi volentes, impediunt, ac se de illarum cognitione, tanquam iudices, interponunt: quive partes actrices, quæ illas committi fecerunt & faciunt, ad revocandum & revocari faciendum, citationes & inhibitiones, aut alias litteras in eis decretas, & ad faciendum vel consentiendum eos, contra quos tales inhibitiones emanarunt, à censuris & pœnis, in illis contentis, absolvi, per statutum vel aliàs compellunt, vel executionem litterarum Apostolicarum, seu executorialium, processuum ac Decretorum prædictorum, quomodolibet impediunt, vel suum ad id favorem, consilium, aut assensum præstant, etiam prætextu violentiæ prohibendæ, vel aliarum prætensionum, seu etiam donec ipsi ad nos informandos, ut dicunt, supplicaverint, aut supplicari fecerint, nisi supplicationes huiusmodi coram nobis & Sede Apostolica legitimè prosequantur, etiamsi talia committentes fuerint Præsidentes Cancellariarum, Conciliorum, Parlamentorum, Cancellarii, Vice-Cancellarii, Consilarii, ordinarii vel extraordinarii, quorumcunque Principum sæcularium, etiamsi

etiãsi Imperiali, Regali, Ducali vel alia quacunque præfulgeant dignitate, aut Archiepiscopi, Episcopi, Abbates, Commendatarii, seu Vicarii, fuerint.

In eos iudices sæculares, qui Ecclesiasticas personas ad sua tribunalia trahunt; quique Ecclesiasticam libertatem tollunt, vel in aliquo lædunt.

X V.

QVive ex eorum prætenso officio, vel ad instantiam partis, aut aliorum quorumcunque personas Ecclesiasticas, Capitula, Conventus, & Collegia Ecclesiarum quarumcunque, coram se ad eorum tribunal, audientiam, Cancellariam, Concilium vel Parlamentum, præter juris Canonici dispositionem, trahunt, vel trahi faciunt vel procurant, directe vel indirecte, quovis quæsito colore; nec non qui statuta, ordinationes, constitutiones, pragmaticas, seu quævis alia decreta, in genere vel in specie, ex quavis causa & quovis quæsito colore, ac etiam prætextu litterarum Apostolicarum, usu non receptarum seu revocatarum, vel cuiusvis consuetudinis aut privilegii, vel alias quomodolibet fecerint, ordinaverint, & publicaverint, vel factis & ordinatis usi fuerint, unde libertas Ecclesiastica tollitur, seu in aliquo læditur, vel deprimatur, aut alias quovis modo restringitur, seu nostris seu dictæ Sedis & quarumcunque Ecclesiarum juribus quomodolibet directe vel indirecte, tacite vel expresse, præjudicatur.

In impediētes Prælatos, ne sua jurisdictione utantur, quique, illorum vel delegatorum judicia eludentes, ad curiam secularem recurrunt.

X V I.

NEc non qui Archiepiscopos, Episcopos, aliosque superiores vel inferiores Prælatos, & omnes alios quoscunque Iudices Ecclesiasticos ordinarios quomolibet, hac de causa, directe vel indirecte, incarcerando, vel molestando, eorum agentes, procuratores, familiares, nec non consanguineos & affines, impediunt, quominus sua jurisdictione Ecclesiastica contra quoscunque utantur, secundum quod Canones & Sacra constitutiones Ecclesiasticæ, & Decreta Conciliorum generalium, & præsertim Tridentini, statuunt; ac etiam eos, qui post ipsorum ordinariorum, vel etiam ab eis delegatorum, quorumcunque sententias ac decreta, aut aliàs fori Ecclesiastici iudicium eludentes, ad cancellarias & alias curias Ecclesiasticas recurrunt, & ab iis prohibitiones, & mandata, etiam pœnalia, ordinariis aut delegatis prædictis decerni, & contra illos exequi procurant; eos quoque, qui hæc decernunt, & exequuntur, seu dant auxilium, consilium, patrocinium vel favorem in eisdem.

In usurpantes Sedis Apostolicæ & quarumcunque Ecclesiarum jurisdictiones, vel etiam fructus sequestrantes.

X V I I.

QVive jurisdictiones, seu fructus, redditus & proventus, ad nos & Sedem Apostolicam, & quascunque Ecclesiasticas personas, ratione Ecclesiarum, Monasteriorum, & aliorum beneficiorum Ecclesiasticorum pertinentes, usurpant, vel etiam quavis occasione vel causa, sine Romani Pontificis, vel eorum ad quos de jure pertinent, expressa licentia, sequestrant.

*In imponentes decimas & onera personis Ecclesiasticis,
Ecclesiis, Monasteriis, aut eorum fructibus.*

X V I I I.

QVive collectas, decimas, taleas, præstantias, & alia onera Clericis, Prælati, & aliis personis Ecclesiasticis, ac eorum, & Ecclesiarum, Monasteriorum, & aliorum beneficiorum Ecclesiasticorum bonis, illorumque fructibus, redditibus, & proventibus hujusmodi, absque simili Romani Pontificis speciali & expressa licentia imponunt, & diversis etiam exquisitis modis exigunt, aut, sic imposita, etiam à sponte dantibus & concedentibus recipiunt: nec non, qui per se vel alium seu alios, directe vel indirecte, prædicta facere, exequi vel procurare, aut in eisdem auxilium, consilium, vel favorem, aut votum seu suffragium palam vel occultè præstare non verentur, cujuscunque sint præminentia, dignitatis, ordinis, conditionis, aut status, etiam si Imperiali vel Regali præfulgeant dignitate, seu Principes, Duces, Comites, Barones, Respub. & alii potentatus, quicunque etiam Regnis, Provinciis, civitatibus & terris quoquo modo præsidentes, aut quavis etiam Pontificali dignitate insigniti: innovantes decreta super his per sacros Canones, tam in Lateranensi novissime celebrato, quam aliis Conciliis generalibus edita, etiam cum censuris & pœnis in eis contentis.

*Contra judices sæculares, in causis capitalibus seu criminalibus
contra Ecclesiasticas personas, se interponentes.*

X I X.

Item excommunicamus & anathematizamus omnes & quoscunque Magistratus, Senatores, præsidentes, auditores, & alios Iudices, quocunque nomine vocentur, ac Cancellarios, Vicecancellarios, Notarios, Scribas,

ac executores & subexecutores, & alios quoquo modo se interponentes, in causis capitalibus seu criminalibus, contra personas Ecclesiasticas, illas banniendo, capiendo, processando, seu sententias contra illas proferendo, vel exequendo, sine speciali, specifica, & expressa hujus sanctæ Sedis Apostolicæ licentia; quique ejusmodi licentiam ad personas & causas non expressas extendunt, vel alias illa perperam abutuntur; etiamsi talia committentes fuerint Consilarii, Senatores, Præsidentes, Cancellarii, Vicecancellarii, aut quovis alio nomine nuncupati.

In occupantes loca & terras Ecclesiæ Romanæ, & in illis supremam jurisdictionem usurpantes.

X X.

Item excommunicamus & anathematizamus omnes illos, qui per se vel alium seu alios, directe vel indirecte, sub quocunque titulo vel colore, de facto occupant, detinent, vel hostiliter destruunt, vel invadunt, vel occupare, detinere, vel destruere, aut invadere hostiliter præsumpserint, in totum vel in partem, Almam Urbem, Regnum Siciliae, Insulas Sardiniae & Corsicae, terras citra Pharum, Patrimonium B. Petri in Tuscia, Ducatum Spoletanum, Comitatum Venayfinum, Sabinensem, Marchiae Anconitanæ, Massæ, Trebariæ, Romandiolæ, Campaniæ, & Maritimas Provincias, illarumque terras & loca, ac terras specialis commissionis Arnulphorum, civitatesque nostras Bononiam, Cæsenam, Ariminum, Beneventum, Perusium, Avenionem, civitatem Castelli, Tudertum, Ferrariam, Comaclum, & alias civitates, terras & loca, vel jura, ad ipsam Romanam Ecclesiam pertinentia, dictæque Romanæ Ecclesiæ mediate vel immediate subjecta: quique supremam jurisdictionem,

in

in illis, nobis, & eidem Romanæ Ecclesiæ competentem, de facto usurpare, perturbare, retinere & vexare variis modis præsumunt: nec non adhærentes, fautores, & defensores eorum, seu illis auxilium, consilium, vel favorem quomodolibet præstantes.

Reservatio absolutionis Romani Pontificis.

X X I.

Cæterum, à prædictis sententiis, nullus per alium, quam per Romanum Pontificem, nisi in mortis articulo constitutus, nec etiam tunc, nisi de stando Ecclesiæ mandatis & satisfaciendo cautione præstita, absolvi possit, etiam prætextu quarumvis facultatum & indultorum, quibuscunque personis Ecclesiasticis, sæcularibus, & quorumvis Ordinum, etiam Mendicantium & Militarium regularibus, etiam Episcopali vel alia majori dignitate præditis, ipsisque Ordinibus, & eorum Monasteriis, Conventibus & Domibus, ac Capitulis, Collegiis, Confraternitatibus, Congregationibus, Hospitalibus, & locis piis, nec non laicis, etiam Imperiali, Regali & alia mundana excellentia fulgentibus, per nos & dictam Sedem, ac cujusvis Concilii decreta, verbo, litteris, aut alia quacunque scriptura in genere & in specie concessorum & innovatorum, ac concedendorum & innovandorum.

Contra absolventes in supradictis casibus.

X X I I.

Quod si forte aliqui, contra tenorem præsentium, talibus excommunicatione & anathemate laqueatis, vel eorum alicui, absolutionis beneficium impendere de facto præsumpserint; eos excommunicationis sententia innodamus, gravius contra illos spiritualiter & temporaliter, pro ut expedire noverimus, processuri.

*Absolutio Romani Pontificis, etiam solemnis,
quos non comprehendat.*

X X I I I.

DEclarantes ac protestantes, quamcunque absolutionem, etiam solemniter per nos faciendam, prædictos excommunicatos, sub præsentibus comprehensos, nisi prius à præmissis, cum vero proposito ulterius similia non committendi, destiterint; ac, quo ad eos qui contra libertatem Ecclesiasticam, ut præmittitur, statuta fecerint, nisi prius statuta, ordinationes, constitutiones, pragmaticas, & decreta hujusmodi publice revocaverint, & ex Archivis seu capitularibus locis aut libris, in quibus annotata reperiuntur, deleri & cassari, ac nos de revocatione hujusmodi certiores fecerint, eos non comprehendere, nec eis aliter suffragari: quin etiam per hujusmodi absolutionem, aut quoscunque alios actus contrarios, tacitos vel expressos, ac etiam per patientiam & tolerantiam nostram, vel successorum nostrorum, quantumcunque tempore continuatam, in præmissis omnibus & singulis ac quibuscunque juribus Sedis Apostolicæ ac sanctæ Romanæ Ecclesiæ, undecunque & quomocunque quæsitis vel quærendis, nullatenus præjudicari posse seu debere.

*Quod non obstant Privilegia, aut quævis Apostolica indulta,
quo minus quis in hoc processu includatur.*

X X I V.

NOn obstantibus privilegiis, indulgentiis, & litteris Apostolicis generalibus vel specialibus supradictis, vel eorum alicui seu aliquibus, & aliis cujuscunque ordinis, status, vel conditionis, dignitatis, & præminentia fuerint; etiam si, ut præmittitur, Pontificali, Imperiali, Regali, seu quavis Ecclesiastica & mundana præfulgeant digni-

dignitate, vel eorum Regnis, Provinciis, civitatibus, seu locis, à prædicta Sede ex quavis causa, etiam per viam contractus aut remunerationis, & sub quavis alia forma & tenore, ac cum quibusvis clausulis, etiam derogatoriis derogatoriis, concessis, etiam continentibus quod excommunicari, anathematizari, vel interdici non possint per litteras Apostolicas, non facientes plenam & expressam ac de verbo ad verbum de indulto huiusmodi, ac de ordinibus, locis, nominibus propriis, cognominibus dignitatibusque eorum, mentionem; nec non consuetudinibus, etiam immemorabilibus, ac præscriptionibus quantumcunque longissimis, & aliis quibuslibet observantiis, scriptis vel non scriptis, per quæ contra hos nostros processus ac sententias, quo minus includantur in eis, se juvare valeant vel tueri: quæ omnia quo ad hoc, eorum omnium tenorem, ac si ad verbum, nihil penitus omisso, infererentur, præsentibus pro expressis habentes, penitus tollimus, & omnino revocamus, cæterisque contrariis quibuscunque.

Quod appensio processus in valvis Ecclesiæ S. Ioannis Lateranensis, aut Basilicæ Principis Apostolorum, ignorantie aut excusationis locum non relinquunt.

X X V.

VT vero præsentis nostri processus ad communem omnium noticiam facilius deducantur, chartas seu membranas, processus ipsos continentes, in valvis Ecclesiæ S. Ioannis Lateranensis, & Basilicæ Principis Apostolorum de Vrbe, appendi fecimus; quæ processus ipsos, quasi sonoro præconio & patulo indicio, publicabunt, ut ii, quos processus huiusmodi contingunt, quod ad ipsos non pervenerint, aut quod ipsos ignoraverint, nullam possint excusationem prætere, aut ignoran-

tiam

tiam allegare; cum non sit verisimile, id remanere incognitum, quod tam patenter omnibus publicatur Insuper, ut processus ipsi ac præsentis litteræ, ac omnia & singula in eis contenta, eo fiant notiora, quo in plerisque civitatibus & locis fuerint publicata; universis & singulis Patriarchis, Primatibus, Archiepiscopis, Episcopis, & locorum Ordinariis, Prælati, & Rectoribus ubilibet constitutis, per hæc nostra scripta committimus, & in virtute sanctæ obedientiæ districtè præcipiendo mandamus, ut, per se vel alium seu alios, præsentis litteras, postquam eas receperint, seu earum habuerint notitiam, semel in anno, aut, si expedire viderint, etiam pluries, in Ecclesiis suis, dum in eis major populi multitudo ad divina convenerit, solemniter publicent, & ad Christi fidelium mentes reducant, nuncient & declarent.

Quod Confessarii harum litterarum transumptum habeant.

X X V I.

CÆterum, hortamur eosdem universos & singulos Patriarchas, Archiepiscopos, Episcopos, aliosque locorum Ordinarios, & Ecclesiarum Prælatos, nec non Rectores cæterosque, curam animarum exercentes, ac Presbyteros sæculares, & quorumvis ordinum Regulares, ad audiendum confessiones quavis autoritate deputatos, ut transumptum harum litterarum penes se habere, legere, & diligenter examinare procurent: volentes earundem præsentium transumptis, etiam impressis, Notarii publici manu subscriptis, & sigillo Iudicis ordinarii Romanæ Curia, vel alterius personæ in dignitate Ecclesiastica constitutæ, munitis, eandem prorsus fidem, in iudicio & extra illud ubique locorum, adhibendam fore, quæ ipsis præsentibus adhiberetur, si essent exhibitæ vel ostensæ. Nulli ergo omnino hominum liceat hanc

paginam nostræ excommunicationis, anathematizationis, interdicti, declarationis, protestationis, sublationis, revocationis, commissionis, innodationis, mandati, hortationis & voluntatis, infringere, vel ei ausu temerario contraire. Si quis autem hoc attentare præsumpserit, indignationem omnipotentis Dei, ac BB. Petri & Pauli Apostolorum ejus, se noverit incursum. Datum Romæ, apud S. Petrum, Anno Incarnationis Dominicæ M DC VI, x Cal. April. Pontificatus nostri Anno primo.

M. Vestrius Barbianus.

C A S V S,
S V M M O P O N T I F I C I
R E S E R V A T I;

A quibus Parochi neminem, citra specialem facultatem, absolvere possunt.

INterficiens aut verberans Clericum; si læsio sit atrox & enormis: persequens Episcopum, vel majorem, & Prælatum.

Qui aliquo externo signo suam hæresin prodit, aut Hæreticis, ab Ecclesia damnatis, circa suas perversas opiniones favet, eosque defendit.

Qui libros hæreticorum scienter legit, aut domi servat, citra specialem dispensationem.

Qui à Romani Pontificis obedientia, & Ecclesiæ Catholicæ unitate, pertinaciter seipsum segregat.

N Falsi-